

1890-ական թվականներ

Ջ. ԲԱՅՐՈՆ

ՄՆԱՍ ԲԱՐՅԱՎ

Մնաս բարյավ, և թե կուգես՝
 Դե հավիտյան մնաս բարյավ.
 Որքան լինիս դու անիրավ
 Վեր չի կենալ սիրտս քո դեմ:
 5 Օ՛, թե կուրծքս ես բանայի,
 Ուր գլուխդ դրել ես դու՝
 Այժմ արդեն անդառնալի
 Կորած քնով՝ հանգել ես դու —

Նորա ներքև կարենայիր
 10 Գաղտնի մտքերըս որոշել,
 Այն ժամանակ կիմանայիր,
 Որ շատ խիստ ես դու ինձ պատժել:

Աշխարհքն, այո՛, գովում է քեզ,
 Ծափ է հարում քո արարքին,
 15 Բայց այդ գովքը պարսավ է քեզ
 [Բայց այդ] ծաղր է իմ տանջանքին:

Իմ մեղքն, [իրավ], ինձ խորտակեց,
Սակայն մի՞թե այլ զենք չըկար.
Եվ այն ձեռքը, որ ինձ գրգվեց,
20 Նա պետք է այս հարվածը տար:

Ոհ, մի՛ խաբվիր ունայն հուսով —
Կըթարշամի սերը կամաց,
Բայց դժվար է կամքի ուժով
Սիրտը սրտից պոկել հանկարծ:

25 Քո սիրտն [այնպես] զարկում է դեռ,
Իմն էլ թեև [միշտ] ցավատանջ,
Խոր կեղեքված ու կարեվեր —
Դողում է դեռ ինչպես առաջ...

էս խոսքերը վիշտ են ամբողջ
30 Մեծ, քան վիշտը սգավորի,
Մենք երկուսս էլ կենդան ու ողջ
Ու ապրում ենք — ինչպես այրի:

Արդյոք երբ դու ուզես հրճվել
Թոթովանքով մեր աղջըկա,
35 Կըսովորցնե՞ս «հայրիկ» կանչել,
Երբ նրա մոտ հայրիկ չըկա:

Կամ նա երբ որ քեզ համբուրի,
Փարի քնքուշ թաթիկներով —
Պիտի հիշե՞ս — ով էր գերի
40 Ու երջանիկ լոկ քո սիրով:

Գուցե հանկարծ հիշես մեկին
Քեզնից հեռո՛ւ, արհամարհված
Ու տըրտփե սիրտըդ կրկին.
Ինչպես երբեմն — ինձ նվիրված:
45 Իմ հանցանքն էլ գուցե հիշես —
Որոնք միայն քեզ են հայտնի,
Տանջանքներս էլ հիշիր նույնպես,
Եվ հույսերըս [անդառնալի]:

[Զգացմունքներս ողջ խորտակված
50 Գոռոզությունս, որ ընկճեցիր,
Նույնիսկ հոգիս քեզնից լքված
Թողնում է ինձ — անշունչ մի իր...]

Ողջ անցել է: Զուր են խոսքերն,
Եվ իմ խոսքից զուրը — չըկա.
55 Բայց [վրդովված միտքն՝ ապստամբ]
Դուրս է հորդում նա ակամա:

Մնաս բարյավ: Այսպես կըտրած
Իմ հարազատ կապերն ամեն,
Մերժված, մենակ, սիրտըս կոտրած,
60 էլ ի՛նչ մահ է ինձ [հարկավոր]: